

四庫全書

史部

欽定四庫全書

史部
通鑑總類卷
十九下

詳校官編修_臣李潢

侍讀_臣孫球覆勘

總校官進士_臣朱鈐

校對官中書_臣張曾炳

謄錄監生_臣安宇樂

欽定四庫全書

通鑑總類卷九下

宋 沈樞 撰

諂諛門

衛子思言君闇臣諂

周安王二十五年衛侯言計非是而羣臣和者如出一
口子思曰以吾觀衛所謂君不君臣不臣者也公丘懿
子曰何乃若是子思曰人主自臧則衆謀不進事是而
臧之猶却衆謀况和非以長惡乎夫不察事之是非而

悅人讚已闇莫甚焉不度理之所在而阿諛求容諂莫甚焉君闇臣諂以居百姓之上民不與也若此不已國無類矣子思言於衛侯曰君之國事將日非矣公曰何故對曰有由然焉君出言自以為是而卿大夫莫敢矯其非卿大夫出言亦自以為是而士庶人莫敢矯其非君臣既自賢矣而羣下同聲賢之賢之則順而有福矯之則逆而有禍如此則善安從生詩曰具曰予聖誰知烏之雌雄抑亦似君之君臣乎

漢轅固戒公孫弘以曲學阿世

元光五年是歲徵吏民有明當世之務習先聖之術者
縣次續食令與計偕菑川人公孫弘對策時對者百餘
人太常奏弘第居下策奏天子擢弘對為第一拜為專
士待詔金馬門齊人轅固年九十餘亦以賢良徵公孫
弘反目而事固固曰公孫子務正學以言無曲學以阿
世諸儒多疾毀固者固遂以老罷歸

孔光等稱王莽功德比周公

元始二年越雋郡上黃龍游江中太師孔光大司徒馬
宮等咸稱王莽功德比周公宜告祠宗廟大司農孫寶
曰周公上聖名公大賢尚猶有不相說著於經典兩不
相損今風雨未時百姓不足每有一事羣臣同聲得無
非其美者時大臣皆失色甄邯即時承制罷議者

東晉桓景諂事王藻

咸康元年丹陽尹桓景為人諂巧王藻親愛之會熒惑
守南斗經句藻謂領軍將軍陶回曰斗揚州之分吾當

遜位以厭天譴回曰公以明德作輔而與桓景造膝使
熒惑何以退舍薰深愧之

王國寶以讒佞有寵於道子

太元十四年琅琊王道子勢傾內外遠近犇湊孝武帝
漸不平然猶外加優崇侍中王國寶以讒佞有寵於道
子扇動朝衆諷八坐啟道子宜進位丞相揚州牧假黃
鉞加殊禮護軍將軍車盾曰此乃成王所以尊周公也
今主上當陽非成王之比相王在位豈得為周公乎乃

稱疾不署疏奏孝武帝大怒而嘉胤有守

王國寶等共為邪諂

二十一年初王國寶黨附會稽王道子驕縱不法屢為御史中丞褚粲所糾國寶起齋佯清暑殿孝武帝甚惡之國寶懼遂更求媚於孝武帝而疎道子孝武帝復寵昵之道子大怒嘗於內省面責國寶以劍擲之舊好盡矣及孝武帝崩國寶復事道子與王緒共為邪諂道子更惑之倚為心腹遂參管朝權威震內外並為時之所

疾王恭入赴山陵每正色直言道子深憚之恭罷朝歎
曰棟棟雖新便有黍離之歎緒說國寶因恭入朝勸相
王伏兵殺之國寶不許道子欲輯和內外乃深布腹心
於恭冀除舊惡而恭每言及時政輒厲聲色道子知恭
不可和協遂有相圖之志或勸恭因入朝以兵誅國寶
恭以豫州刺史庾楷士馬甚盛黨于國寶憚之不敢發
王珣謂恭曰國寶雖終為禍亂要之罪逆未彰今遽先
事而發必大失朝野之望况擁彊兵竊發於京輦誰謂

非逆國寶若遂不改惡布天下然後順衆心以除之亦無憂不濟也恭乃止

南燕鞠仲媚備德為少康光武之儔

隆安五年南燕主備德宴羣臣於延賢堂酒酣謂羣臣曰朕可方自古何等主青州刺史鞠仲曰陛下中興聖主少康光武之儔備德顧左右賜仲帛千匹仲以所賜多辭之備德曰卿知調朕朕不知調卿邪卿所對非實故朕亦以虛言賞卿耳韓範進曰天子無戲言今日之

論君臣俱失備德大悅賜範絹五十匹

宋顏師伯以諂佞被親任

大明四年是歲孝武帝徵青冀二州刺史顏師伯為侍中師伯以諂佞被親任羣臣不及多納貨賄家累千金孝武帝嘗與之搏蒲孝武帝擲得雉自謂必勝師伯次擲得盧孝武帝失色師伯遽斂子曰幾作盧是日師伯一輸百萬

劉德願哭貴妃以獲賞

七年以秦郡太守劉德願為豫州刺史孝武帝既葬殷貴妃數與羣臣至其墓謂德願曰卿哭貴妃悲者當厚賞德願應聲慟哭撫膺擗踊涕泗交流孝武帝甚悅故用為豫州刺史以賞之

齊江柘勸宣城王出誌以示人

建武元年宣城王鸞雖專國政人情猶未服王胛上有赤誌驃騎諂議參軍江柘勸王出以示人王以示晉壽太守王洪範曰人言此是日月相卿幸勿泄洪範曰公

日月在軀如何可隱當轉言之

北齊和士開以姦諂有寵

陳天嘉四年齊侍中開府儀同三司和士開有寵於齊世祖齊世祖外朝視事或在內宴賞須臾之間不得不與士開相見或累日不歸一日數入或放還之後俄頃即追未至之間連騎督趣姦諂百端寵愛日隆前後賞賜不可勝紀每侍左右言辭容止極諸鄙褻以夜繼晝無復君臣之禮嘗謂世祖曰自古帝王盡為灰土堯舜

桀紂竟復何異陛下宜及少壯極意為樂縱橫行之一日取快可敵千年國事盡付大臣何慮不辦無為自勤約也世祖大悅于是委趙彥深掌官爵元文遙掌財用唐邕掌外騎兵信都馮子琮胡長粲掌東宮世祖三四日一視朝書數字而已略無所言須臾罷入

朝士不恥為和士開假子

大建二年和士開為尚書令賜爵淮陽王威權日盛朝士不知廉恥者或為之假子與富商大賈同在伯仲之

列嘗有一人士參士開疾值醫云王傷寒極重佗藥無
効應服黃龍湯士開有難色人士曰此物甚易服王不
須疑請為王先嘗之一舉而盡士開感其意為之強服
遂得愈

隋虞世基抑損表狀

大業十二年內史侍郎虞世基以煬帝惡聞賊盜諸將
及郡縣有告敗求救者世基皆抑損表狀不以實聞但
云鼠竊狗盜郡縣捕逐行當殄盡願陛下勿以介懷煬

帝良以為然或杖其使者以為妄言由是盜賊徧海內
陷沒郡縣煬帝皆弗之知也楊義臣破降河北賊數十
萬列狀上聞煬帝歎曰我初不聞賊頓如此義臣降賊
何多也世基對曰小竊雖多未足為慮義臣克之擁兵
不少久在閩外此最非宜煬帝曰卿言是也遽追義臣
放散其兵賊由是復盛

封德彝諂順帝意

義寧元年李密使其幕府移檄郡縣數煬帝十罪且曰

罄南山之竹書罪無窮決東海之波流惡難盡祖君彥
之辭也越王侗遣太常丞元善達間行賊中詣江都奏
稱李密有衆百萬圍逼東都據洛口倉城內無食若陛
下速還烏合必散不然者東都決沒因獻欬嗚咽煬帝
為之改容虞世基進曰越王年少此輩誑之若如所言
善達何緣來至煬帝乃勃然怒曰善達小人敢廷辱我
因使經賊中向東陽催運善達遂為羣盜所殺是後人
人杜口莫敢以賊聞世基容貌沈審言多合意特為煬

帝所親愛朝臣無與為比親黨憑之鬻官賣獄賄賂公
行其門如市由是朝野共疾怨之內史舍人封德彝託
附世基以世基不閑吏務密為指畫宣行詔命諂順帝
意羣臣表疏忤旨者皆屏而不奏鞠獄用法多峻文深
詆論功行賞則抑削就薄故世基之寵日隆而隋政益
壞皆德彝所為也

唐高祖責封德彝諂巧不忠

武德二年高祖以封德彝隋室舊臣而諂巧不忠深誚

責之罷遣就舍德彛以祕策干高祖高祖悅尋拜內史
舍人俄遷侍郎

太宗不肯陽怒試佞臣

貞觀元年有上書請去佞臣者太宗問佞臣為誰對曰
臣居草澤不能的知其人願陛下與羣臣言或陽怒以
試之彼執理不屈者直臣也畏威順旨者佞臣也太宗
曰君源也臣流也濁其源而求其流之清不可得矣君
自為詐何以責臣下之直乎朕方以至誠治天下見前

世帝王好以權譎小數接其臣下者常竊恥之卿策雖善朕不取也

太宗疑宇文士及為佞人

十六年殿中監宇文士及卒太宗嘗止樹下愛之士及從而譽之不已太宗正色曰魏徵常勸我遠佞人我不知佞人為誰意疑是汝今果不謬士及叩頭謝

楊再思專以諂媚取容

長安三年以神都副留守楊再思為內史再思為相專

以諂媚取容司禮少卿張同休易之之兄也嘗召公卿
宴集酒酣戲再思曰楊內史面似高麗再思欣然即剪
紙帖巾反披紫袍為高麗舞舉坐大笑時人或譽張昌
宗之美曰六郎面似蓮花再思獨曰不然昌宗問其故
再思曰乃蓮花似六郎耳

祝欽明自請作八風舞

景雲元年中宗宴近臣國子祭酒祝欽明自請作八風
舞搖頭轉目備諸醜態中宗笑欽明素以儒學著名吏

部侍郎盧藏用私謂諸學士曰祝公五經掃地盡矣

宋璟止立碑以革諂諛之風

開元六年廣州吏民為宋璟立遺愛碑璟上言臣在州無它異迹今以臣光寵成彼諂諛欲革此風望自臣始請敕下禁止明皇從之於是它州皆不敢立

李齊運以柔佞得幸

貞元十二年以開廡宮苑使李齊運為禮部尚書齊運無才能學術專以柔佞得幸於德宗每宰相對罷則齊

運次進決其議或病卧家德宗欲有所除授往往遣中使就問之

吐突承瓘奏立聖德碑

元和四年左軍中尉吐突承瓘領功德使盛修安國寺奏立聖德碑高大一準華獄碑先構碑樓請敕學士撰文且言臣已具錢萬緡欲酬之憲宗命李絳為之絳上言堯舜禹湯未嘗立碑自言聖德惟秦始皇于巡遊所過刻石高自稱述未審陛下欲何所法且敕修寺之美

不過壯麗觀遊豈所以光益聖德憲宗覽奏承瓘適在
旁憲宗命曳倒碑樓承瓘言碑樓甚大不可曳請徐毀
撤冀得延引乘間再論憲宗厲聲曰多用牛曳之承瓘
乃不敢言凡用百牛曳之乃倒

蘇循望府解即拜

後梁龍德元年晉王既許藩鎮之請求唐舊臣欲以備
百官朱友謙遣前禮部尚書蘇循詣行臺循至魏州入
牙城望府解即拜謂之拜殿見王呼萬歲舞蹈泣而稱

臣翌日又獻大筆三十枚謂之畫日筆王大喜即命循以本官為河東節度副使張承業深惡之

南唐主不從諂邪之人以事更改

後晉天福三年或獻毒酒方於唐主唐主曰犯吾法者自有常刑安用此為羣臣爭請改府寺州縣名有吳及陽者留守判官楊嗣請更姓羊徐玠曰陛下自應天順人事非逆取而諂邪之人專事改更咸非急務不可從也唐主然之

孫晟自謂諂詐不如馮延巳

八年駕部郎中馮延巳為齊王元帥府掌書記性傾巧與宋齊丘及宣徽副使陳覺相結同府在巳上者延巳稍以計逐之延巳嘗戲謂中書侍郎孫晟曰公有何能為中書郎晟曰晟山東鄙儒文章不如公談諧不如公諂詐不如公然主上使公與齊王遊處蓋欲以仁義輔導之也豈但為聲色狗馬之友邪晟誠無能如公之能適足為國家之禍耳

馮延巳等極傾諂之態

後漢天福十二年唐主立齊王景遂為皇太弟徙燕王景達為齊王領諸道兵馬元帥景達性剛直唐主與宗室近臣飲馮延巳延魯魏岑陳覺輩極傾諂之態或乘酒喧笑景達屢呵責之復極言諫唐主以不宜親近佞臣延巳以二弟立非己意欲以虛言德之嘗宴東宮陽醉撫景達背曰爾不可忘我景達大怒拂衣入禁中白唐主請斬之唐主諭解乃止張易謂景達曰羣小交構

禍福所繫殿下力未能去數面折之使彼懼而為備何所不至自是每遊宴景達多辭疾不預

馮延巳與其黨更相唱和

顯德五年唐主避周諱更名景下令去帝號稱國主凡天子儀制皆有降損去年號用周正朔仍告於太廟初馮延巳以取中原之策說唐主由是有寵延巳常笑烈祖戢兵為齷齪曰安陸所喪纔數千兵為之輟食咨嗟者旬日此田舍翁識量耳安足與成大事豈如今上暴

師數萬於外而擊毬宴樂無異平日真英主也延巳與其黨談論常以天下為己任更相唱和翰林學士常夢錫屢言延巳等浮誕不可信唐主不聽夢錫曰姦言似忠陛下不悟國必亡矣及臣服于周延巳之黨相與言有謂周為大朝者夢錫大笑曰諸公常欲致君堯舜何意今日自為小朝邪衆默然

品藻門

吳陸喜謂薛瑩在四五之間

晉太康三年是歲散騎常侍薛瑩卒或謂吳郡陸喜曰瑩于吳士當為第一乎喜曰瑩在四五之間安得為第一夫以孫皓無道吳國之士沈默其體潛而勿用者第一也避尊居卑祿以代耕者第二也侃然體國執正不懼者第三也斟酌時宜時獻微益者第四也溫恭修慎不為諂首者第五也過此以往不足復數故彼上士多淪沒而遠悔吝中士有聲位而近禍殃觀瑩之處身本末又安得為第一乎

東晉桓彝謂褚裒有皮裏春秋

咸和元年庾亮鎮武昌辟殷浩為記室參軍浩與豫章太守褚裒丹陽丞杜乂皆以識度清遠善談老易擅名江東而浩尤為風流所宗桓彝嘗謂裒曰季野有皮裏春秋言其外無臧否而內有褒貶也謝安曰裒雖不言而四時之氣亦備矣

唐王珪品藻房玄齡等

貞觀四年諸宰相侍宴太宗謂王珪曰卿識鑒精通復

善談論房玄齡以下卿宜悉加品藻且自謂與數子何如對曰孜孜奉國知無不為臣不如玄齡才兼文武出將入相臣不如李靖敷奏詳明出納惟允臣不如溫彥博處繁治劇衆務畢舉臣不如戴胄恥君不及堯舜以諫諍為己任臣不如魏徵至于激濁揚清嫉惡好善臣於數子亦有微長太宗深以為然衆亦服其確論

太宗面舉羣臣得失

十八年太宗謂司徒長孫无忌等曰人若不自知其過

卿可為朕明言之對曰陛下武功文德臣等將順之不暇又何過之可言太宗曰朕問公以已過公等乃曲相諛悅朕欲面舉公等得失以相戒而改之何如皆拜謝太宗曰長孫无忌善避嫌疑應物敏速決斷事理古人不過而總兵攻戰非其所長高士廉涉獵古今心術明達臨難不改節當官無明黨所乏者骨鯁規諫耳唐儉言辭辯捷善和解人事朕三十年遂無言及于獻替揚師道性行純和自無愆違而情實怯懦緩急不可得力

岑文本性質敦厚文章華贍而持論恒據經遠自當不負於物劉洎性最堅貞有利益然其意尚然諾私于朋友馬周見事敏速性甚貞正論量人物直道而言朕比任使多能稱意褚遂良學問稍長性亦堅正每寫忠誠親附于朕譬如飛鳥依人人自憐之

裴行儉有知人之鑒

永淳元年裴行儉有知人之鑒初為吏部侍郎前進士王劇咸陽尉蘇味道皆未知名行儉一見謂之曰二君

後當相次掌銓衡僕有弱息願以為託是時劇弟勃與
華陰楊炯范陽盧照鄰義烏駱賓王皆以文章有盛名
司列少常伯李敬玄尤重之以為必顯達行儉曰士之
致遠者當先器識而後才藝勃等雖有文華而浮躁淺
露豈享爵祿之器耶楊子稍沈靜應至令長餘得令終
幸矣既而勃度海墮水炯終于盈川令照鄰惡疾不愈
赴水死賓王反誅勳味道皆典選如行儉言行儉為將
帥所引偏裨如程務挺張虔勗王方翼劉敬同李多祚

黑齒常之後多為名將

論時政門

東漢荀悅作申鑒五篇

建安十年荀悅作申鑒五篇奏之時政在曹氏天子恭已悅志在獻替而謀無所用故作是書其大略曰為政之術先屏四患乃崇五政偽亂俗私壞法放越軌奢敗制四者不除則政末由行矣是謂四患興農桑以養其生審好惡以正其俗宣文教以彰其化立武備以秉其

威明賞罰以統其法是謂五政人不畏死不可懼以罪人不樂生不可勸以善故在上者先豐民財以定其志是謂養生善惡要乎功罪毀譽效於準驗聽言責事舉名察實無或詐偽以蕩衆心故俗無姦怪民無淫風是謂正俗榮辱者賞罰之精華也故禮教榮辱以加君子化其情也桎梏鞭撻以加小人化其形也若教化之廢推中人而墜於小人之域教化之行引中人而納於君子之塗是謂章化在上者必有武備以戒不虞安居則

寄之內政有事則用之軍旅是謂秉威賞罰政之柄也
人主不妄賞非愛其財也賞妄行則善不勸矣不妄罰
非矜其人也罰妄行則惡不懲矣賞不勸謂之止善罰
不懲謂之縱惡在上者能不止下為善不縱下為惡則
國法立矣是謂統法四患既蠲五政又立行之以誠守
之以固簡而不怠疎而不失垂拱揖讓而海內平矣

仲長統著昌言論

十一年仲長統著論曰昌言其言治亂略曰豪傑之當

天命者未始有天下之分者也無天下之分故戰爭者
競起焉角智者皆窮角力者皆負形不堪復仇執不足
復校乃始羈首係頸就我之銜絀耳及繼體之時豪傑
之心既絕士民之志已定貴有常家尊在一人當此之
時雖下愚之才居之猶能使恩同天地威侔鬼神周孔
數千無所復角其聖賁育百萬無所復奮其勇矣彼後
嗣之愚主見天下莫敢與之違自謂若天地之不可忘
也乃犇其私嗜騁其邪欲君臣宣淫上下同惡荒廢庶

政棄忘人物信任親愛者盡佞諂容說之人也寵貴隆
豐者盡后妃姬妾之家也遂至熬天下之脂膏斲生民
之骨髓怨毒無聊禍亂並起中國擾攘四夷侵叛土崩
瓦解一朝而去昔之為我哺乳之子孫者今盡是我飲
血之寇讎也至于運徙執去猶不覺悟者豈非富貴生
不仁沈溺致愚疾邪存亡以之迭代治亂從此周復天
道常然之大數也

晉熊遠上疏言三失

建武元年詔羣公卿士各陳得失熊遠上疏以為胡賊
猾夏梓宮未返而不能遣軍進討一失也羣官不以讎
賊未報為恥務在調戲酒食而已二失也選官用人不
料實德惟在白望不求才幹惟事請托當官者以治事
為俗吏奉法為苛刻盡禮為諂諛從容為高妙放蕩為
達士驕蹇為簡雅三失也世之所惡者陸沈泥滓時之
所善者翱翔雲霄是以萬機未整風俗偽薄朝廷羣司
以從順為善相違見貶安得朝有辨爭之臣士無祿仕

之志乎

應詹上疏言崇獎儒官

太興二年應詹上疏曰元康以來賤經尚道以玄虛宏放為夷達以儒術清儉為鄙俗宜崇獎儒官以新俗化

宋周朗上疏言備胡奢侈之弊

元嘉三十年七月朔日有食之詔求直言周朗上疏以為毒之在體必割其緩處歷下泗間不足戍守議者必以為胡衰不足避而不知我之病甚于胡矣今空守孤

城徒費財役使虜但發輕騎三千更互出入春來犯麥
秋至侵禾水陸漕輸居然復絕於賊不勞而邊已困不
至二年卒散民盡可躡足而待也今人知不以羊追狼
蟹捕鼠而令重車弱卒與肥馬悍胡相逐其不能濟固
宜矣又舉天下以奉一君何患不給一體炫金不及百
兩一歲美衣不過數襲而必收寶連櫝集服累笥目豈
常視身未時親是櫝帶寶笥著衣也何糜蠹之劇感鄙
之甚邪且細作始并以為儉節而市造華怪即傳於民

如此則遷也非罷也凡厥庶民制度日侈見車馬不辨
貴賤視冠服不知尊卑尚方今造一物小民明已睥睨
宮中朝制一衣庶家晚已裁學侈麗之源實先宮闈凡
無世不有言事無時不有下令然升平不至昏危相繼
何哉設令之本非實故也書奏忤旨自解去職

齊劉善明等各言得失

建元元年太祖命羣臣各言得失淮南宣城二郡太守
劉善明請除宋氏大明泰始以來諸苛政細制以崇簡

易又以為交州險遠宋末政苛遂至怨叛今大化創始
宜懷以恩德且彼土所出唯有珠寶實非聖朝所須之
急討伐之事謂宜且停宋元嘉之世凡事皆責成郡縣
世祖徵求急速以郡縣遲緩始遣臺使督之自是使者
所在旁午競作威福營私納賂公私勞擾會稽太守聞
喜公子良上表極言其弊以為臺有求須但明下詔敕
為之期會則人思自竭若有稽違自依糾坐之科宜悉
停臺使負外散騎郎劉思效上言宋自大明以來漸見

彫弊徵賦有加而天府尤貧小民嗷嗷殆無生意而貴族富室以侈麗相高乃至山澤之民不敢采食其水草陛下宜一新王度革正其失太祖皆加褒賞或以表付外使有司詳擇所宜奏行之

李彪上封事

永明六年魏主訪羣臣以安民之術李彪上封事以為豪貴之家奢僭過度第宅車服宜為之等制又國之興亡在家嗣之善惡家嗣善惡在教諭之得失高宗皇帝

嘗謂羣臣曰朕始學之日年尚幼冲情未能專既臨萬
機不遑溫習今日思之豈惟予咎抑亦師傅之不勤尚
書李訢免冠謝此近事之可鑒者也臣謂宜準古立師
傅之官以訓導太子又漢置常平倉以救匱乏去歲京
師不稔移民就豐既廢營生困而後達又于國體實有
虛損曷若預儲倉粟安而給之豈不愈于驅督老弱餬
口千里之外哉宜析州郡常調九分之二京師度支歲
用之餘各立官司年豐糴粟積之於倉儉則加私之二

糶之於人如此民必力田以取官絹積財以取官粟年登則常積歲凶則直給數年之中穀積而人足雖災不為害矣魏主皆從之

魏韓顯宗上書陳事

齊建武元年魏主如洛陽西宮中書侍郎韓顯宗上書陳四事其一以為往冬輿駕停鄴當農隙之時猶比屋供奉不勝勞費况今蠶麥方急將何以堪命且六軍涉暑恐生癘疫臣願早還北京以省諸州供張之苦成洛

都營繕之役其二以為洛陽宮殿故基皆魏明帝所造
前世已譏其奢今茲營繕宜加裁損其三以為陛下之
還洛陽輕將從騎王者於闥闥之內猶施警蹕况涉履
山河而不加三思乎其四以為陛下耳聽法音目翫墳
典口對百辟心虞萬機景昃而食夜分而寢加以孝思
之至隨時而深文章之業日成篇卷雖叡明所用未足
為煩然非所以嗇神養性保無疆之祚也魏主頗納之
顯宗又上言以為州郡貢察徒有秀孝之名而無秀

孝之實朝廷但檢其門望不復彈坐如此則可令別貢門望以敘士人何假冒秀孝之名也夫門望者乃其父祖之遺烈亦何益于皇家益于時者賢才而已苟有其才雖屠釣奴虜聖王不恥以為臣苟非其才雖三后之胤墜于皂隸矣議者或云今世等無奇才不若取士于門此亦失矣豈可以世無周邵遂廢宰相邪但當校其寸長銖重者先敘之則賢才無遺矣又刑罰之要在乎明當不在于重苟不失有罪雖捶撻之薄人莫敢犯若

容可僥幸雖參夷之嚴不足懲禁今內外之官欲邀當時之名爭以深酷為無私迭相敦厲遂成風俗陛下居九重之內視人如赤子百司分萬務之任遇下如仇讎是則堯舜止一人而桀紂以千百和氣不至蓋由于此謂宜敕示百僚以惠元元之命帝覽奏甚善之

梁賀琛啟陳四事

大同十一年散騎常侍賀琛啟陳四事其一以為今北邊稽服正是生聚教訓之時而天下戶口減落關外彌

甚郡不堪州之控總縣不堪郡之哀削更相呼擾惟事
徵斂民不堪命各務流移此豈非牧守之過歟東境戶
口空虛皆由使命繁數窮幽極遠無不皆至每有一使
所屬搔擾鴛鴦困邑宰則拱手聽其漁獵桀黠長吏又因
之重為貪殘縱有廉平郡猶掣肘如此雖年降復業之
詔屢下蠲賦之恩而民不得反其居也其二以為今天
下守宰所以貪殘良由風俗侈靡使之然也今之燕喜
相競誇豪積果如丘陵列肴同綺繡露臺之產不周一

燕之資而賓主之間裁取滿腹未及下堂已同臭腐又
畜妓之夫無有等秩為吏牧民者致貲巨億罷歸之日
不支數年率皆盡于燕飲之物歌謠之具所費事等丘
山為歡止在俄頃乃更追恨向所取之少如復傅翼增
其搏噬一何悖哉其餘淫侈著之凡百習以成俗日見
滋甚欲使人守廉白安可得邪誠宜嚴為禁制道以節
儉糾奏浮華變其耳目正彫流之弊矣其三以為陛
下憂念四海不憚勤勞至於百司莫不奏事但斗筭之

人既得伏奏帷宸便欲詭競求進不論國之大體心存
明恕惟務吹毛求疵擘肌分理以深刻為能以繩逐為
務迹雖似于奉公事更成其威福犯罪者多巧避滋甚
長弊增姦實由於此誠願責其公平之效黜其讒慝之
心則下安上謚無僥倖之患矣其四以為今天下無事
而猶日不暇給宜省事息費事省則民養費息則財聚
興造有非急者徵求有可緩者皆宜停省以息費休民
故畜其財者所以大用之也養其民者所以大役之也

若言小事不足害財則終年不息矣以小役不足妨民則終年不止矣如此則難可以語富彊而圖遠大矣啟奏武帝大怒召主書于前口授敕書以責琛

周樂遜上言四事

永定二年周以霖雨詔羣臣上封事極諫左光祿大夫猗氏樂遜上言四事其一以為比來守令代期既促責其成效專務威猛今關東之民淪陷塗炭若不布政優優聞諸境外何以使彼勞民歸就樂土其二以為項者

魏都洛陽一時殷盛貴勢之家競為侈靡終使禍亂交興天下喪敗比來朝貴器服稍華百工造作務盡奇巧臣誠恐物逐好移有損政俗其三以為選曹補擬宜與衆共之今州郡選置猶集鄉閭况天下銓衡不取物望既非機事何足可密其選置之日宜令衆心明白然後呈奏其四以為高洋據有山東未易猝制譬猶碁劫相持爭行先後若一行不當或成彼利誠應捨小營大先保封域不宜貪利邊陲輕為興動

唐魏元忠言禦吐蕃之策

儀鳳三年高宗以吐蕃為憂太學生宋城魏元忠上封
事言禦吐蕃之策以為理國之要在文與武今言文者
則以辭華為首而不及經綸言武者則以騎射為先而
不知方略是皆何益于理亂哉故陸機著辨亡之論無
救河橋之敗養由基射穿七札不濟鄆陵之師此已然
之明效也故選將當以智略為本勇力為末今朝廷用人
類取將門子弟及死事之家彼皆庸人豈足當閫外之

任李左車陳湯呂蒙孟觀皆出貧賤而立殊功未聞其
家代為將也夫賞罰者軍國之切務近日征伐虛有賞
格而無事實蓋由小才之吏不知大體徒惜勲庸恐虛
倉庫不知士不用命所損幾何黔首雖微不可欺罔豈
得懸不信之令設虛賞之科而望其立功乎又出師之
要全資馬力臣請開畜馬之禁使百姓皆得畜馬若官
軍大舉委州縣長吏以官錢增價市之則皆為官有彼
胡虜恃馬力以為彊若聽人間市而畜之乃是損彼之

疆為中國之利也先是禁百姓畜馬故元忠言之高宗善其言

天后問陳子昂為政之要

永昌元年問正字陳子昂當今為政之要子昂退上疏以為宜緩刑崇德息兵革省賦役撫慰宗室各使自安辭婉意切其論甚美幾三千言

劉知幾表陳四事

天冊萬歲元年劉知幾表陳四事其一以為皇業權輿

天地開闢嗣君即位黎元更始則時藉非常之慶以申再造之恩今六合清晏而赦令不息近則一年再降遠則每歲無遺至于違法悖禮之徒無賴不仁之輩編戶則寇攘為業當官則贓賄是求而元日之朝指期天澤重陽之節佇降皇恩如其忖度咸果釋免或有名垂結正罪將斷決竊行貨賄方便規求故致稽延畢霑寬宥用使俗多頑悖時罕廉隅為善者不預恩光作惡者獨承徽倖古語曰小人之幸君子之不幸斯之謂也望陛

下而今而後頗節於赦使黎氓知禁姦宄肅清其二以
為海內具僚九品以上每歲逢赦必賜階勳至于朝野
宴集公私聚會緋服衆于青衣象板多于木笏皆榮非
德舉位罕才升不知何者為妍蚩何者為美惡臣望自
今以後稍息私恩使有善者逾効忠勤無才者咸知勉
勵其三以為陛下臨朝踐極取士太廣六品以下職事
清官遂乃方之土芥比之沙礫若遂不加沙汰臣恐有
穢皇風其四以為今之牧伯遷代太速條來忽往蓬轉

萍流既懷苟且之謀何暇循良之政望自今刺史非三歲以上不可遷官仍明察功過尤甄賞罰疏奏太后頗嘉之

宋務光上疏言水災

神龍元年河南北十七州大水求直言右衛騎曹叅軍西河宋務光上疏以為水陰類臣妾之象恐後庭有干外朝之政者宜杜絕其萌今霖雨不止乃閉坊門以攘之至使里巷謂坊門為宰相言朝廷使之變理陰陽也

疏奏不省

楊相如上疏言時政

開元元年晉陵尉楊相如上疏言時政其略曰煬帝自恃其疆不憂時政雖制敕交行而聲實舛謬言同堯舜迹如桀紂舉天下之大一擲而棄之又曰人主莫不好忠正而惡佞邪然忠正者常踈佞邪者常親以至於覆國危身而不寤者何哉誠由忠正者多忤意佞邪者多順指積忤生憎積順生愛此親疏之所以分也明主則

不然愛其忤以收忠賢惡其順以去佞邪則太宗太平之業將何遠哉明皇覽而善之

晉州男子獻三十字

大曆八年晉州男子郇模以麻瓣髮持竹筐葦席哭于東市人問其故對曰願獻三十字一字為一事若言無所取請以席裹屍貯筐中棄于野京兆以聞代宗召見賜新衣館于客省其言團者請罷諸州團練使也監者請罷諸道監軍使也

陸贄上奏帝不能用

建中四年初德宗在東宮聞監察御史嘉興陸贄名即位召為翰林學士數問以得失時兩河用兵久不決賦役日滋贄以兵窮民困恐別生內變乃上奏其略曰克敵之要在乎將得其人馭將之方在乎操得其柄將非其人者兵雖衆不足恃操失其柄者將雖材不為用又曰將不能使兵國不能馭將非止費財翫寇之弊亦有不戢自焚之災又曰無紓目前之虞或興意外之患人

者邦之本也財者人之心也其心傷則其本傷其本傷則枝幹顛瘁矣又曰人搖不寧事變難測是以兵貴拙速不尚巧遲若不靖于本而務救于末則救之所為乃禍之所起也又論關中形勢以為王者蓄威以昭德偏廢則危居重以馭輕倒持則悖王畿者四方之本也太宗列置府兵分隸禁衛大凡諸府八百餘所而在關中者殆五百焉舉天下不敵關中則居重馭輕之意明矣承平漸久武備浸微雖府衛具存而卒乘罕習故祿山

竊倒持之柄乘外重之資一舉滔天兩京不守是皆失
居重馭輕之權忘深根固抵之慮陛下追想及此豈不
為之寒心哉今朔方太原之衆遠在山東神策六軍之
兵繼出關外關輔之間徵發已甚宮苑之內備衛不全
萬一將帥之中又如朱滔希烈或負固邊壘誘致豺狼
或竊發郊畿驚犯城闕未審陛下復何以備之陛下儻
過聽愚計所遣神策六軍李晟等及節將子弟悉可追
還明敕涇隴邠寧但令嚴備封守仍云更不徵發使知

各保安居又降德音罷京城及畿縣間架等雜稅則冀已輸者弭怨見處者獲寧人心不搖邦本自固德宗不能

李翱言六者政之根本

元和十四年史館修撰李翱上言以為定禍亂者武功也興太平者文德也今陛下既以武功定海內若遂革弊事復高祖太宗舊制用忠正而不疑屏邪佞而不邇改稅法不督錢而納布帛絕進獻寬百姓租賦厚邊兵

以制戎狄侵盜數訪問待制官以通塞蔽此六者政之根本太平所以興也

楊虞卿上疏諫穆宗

十五年穆宗御丹鳳門樓赦天下事畢盛陳倡優雜戲於門內而觀之又幸左神策軍觀手搏雜戲監察御史楊虞卿上疏以為陛下宜延對羣臣周徧顧問惠以氣色使進忠若趨利論政若訴寃如此而不致升平者未之有也

後唐史在德上書歷詆文武之士

清泰元年太常丞史在德性狂狷上書歷詆内外文武之士請徧加考試黜陟能否執政及朝士大怒盧文紀及補闕劉濤楊昭儉等皆請加罪潞王謂學士馬胤孫曰朕新臨天下宜開言路若朝士以言獲罪誰敢言者卿為朕作詔書宣朕意乃下詔略曰昔魏徵請賞皇甫德參今濤等請黜史在德事同言異何其遠哉在德情在傾輸安可責也

殷潘承祐上書陳十事

後晉天福八年殷吏部尚書潘承祐上書陳十事大指
言兄弟相攻逆傷天理一也賦斂煩重力役無節二也
發民為兵羈旅愁怨三也揚思恭奪人衣食使歸怨於
上羣臣莫敢言四也疆土狹隘多置州縣增吏困民五
也除道裹糧將攻臨汀曾不憂金陵錢塘乘虛相襲六
也括高貲戶財多者補官逋負者被刑七也延平諸津
征果菜魚米獲利至微斂怨甚大八也與唐吳越為鄰

即位以來未嘗通使九也宮室臺榭崇飾無度十也殷
王延政大怒削承祐官爵勒歸私第

知典故門

晉元帝取決刁協賀循

建武元年是時承喪亂之後江東草創刁協久宦中朝
諳練舊事賀循為世儒宗明習禮學凡有疑議皆取決
焉

齊王儉諳憶故事

永明三年王儉領國子祭酒撰次朝儀國典自晉宋以來故事無不諳憶故當朝理事斷決如流每博議引證八坐丞郎無能異者令史諮事常數十人賓客滿席儉應接辨析傍無留滯發言下筆皆有音彩儉嘗謂人曰江左風流宰相唯有謝安意以自比也武帝深委仗之

欲知古問高君

唐開元四年紫微舍人高仲舒博通典籍齊澣練習時務姚宋每坐二人以質所疑既而歎曰欲知古問高君

欲知今問齊君可以無缺政矣

通鑑總類卷九下